

治

譜

治譜卷之六

中丞健吾先生余自強著

後學李長德仲延彙

李模子木閱

陳龍正幾亭評

蔡懋德公虞訂

范志完叔愷叅

胡璇政初較

人命門

禁防人命

一人命未必皆報仇爭利。多是愚民以言語杯酒。不忍一朝之忿。遂致隕命。其中有毆死有自盡者。皆

因鄰佑諸人於相嚷時不肯極力解散。乃致毆死。相嚷後家人又不肯多方勸解。看守以致自盡。今後凡民間酒狂小事。不平嚷鬧。地方親友即便勸解。父子兄弟即便看守。若漫不經心。致令毆死。自盡。父子兄弟及地方人等各責若干。○按人命未重傷而死者。其故非一。或貧不能自給。重之以錢。寒致有失於調護死者。或以中風別瘖死者。或有親戚利於人死。因而制死者。傷生害人。莫此為甚。今後凡愚民相毆。但致重傷。官既驗過。即送地方。

家將養兒手出備飲食湯藥調治晝夜看守毋令
疎失。

禁輕生

一人誰不愛其生乃至輕生自盡無聊之人莫有以
利之耳官府遇此不斷埋葬此心不安若斷埋葬
再稍懲愚利之者衆死者亦衆矣清廉陰隲之吏
遇此等輕生地方宜官置棺材數十付衣服數十
領審出圖賴真情分文不斷徑將官置衣棺即刻
押埋百姓聞風毫無所利不一月而圖賴之風絕

矣。先大夫令善化其俗。騙人嗜食鼠莽草而死。或
本人不欲。則人灌之。因用此法。今遂無人識此草
者。所全活不可屈指矣。此居官第一救人事也。○
再照輕生者。非投河則自縊服毒耳。醫書中多有
經驗良方。有司官宜命醫生選集。稽書刻示到處。
張掛。如遇輕生親鄰。不依方救治。俟告官日。並重
處。

治兇徒

一悍地人命多係棍徒合黨。或打手行兇。今後凡人

不安生理、成群結黨、使酒撒潑、打街罵巷、因而致死人命者、除為首依律抵償外、為從者盡法責治。然後問擬應得罪名、即被打之人不死亦枷號閱罪。

告明辜限

一人命若待死而後告、則假者亦得混賴。今後凡人命非登時打死者、相打後即告明本縣驗傷、責行兇者立定辜限。不死者以鬪毆論、死者以人命論。如毆傷家無力赴告、鄉約地方保正隣佑代呈。如

待死後方告者。屍親人等先責若干。然後問理。若有頭腦破傷鎗刀殺傷者。不必送驗。恐防中風。鄉保人等解兇手立限。則人命之真偽未死時已先定矣。

治扛屍兇俗

兇俗之民。以人命為奇貨。但死一人。即扛屍上門。毀人門戶。碎人房屋。勢同狼虎。又棍徒扛幫謀和挾詐。曾未入官。而家已破矣。今後凡人命不待告官。擅自扛屍打搶者。先治打搶之罪。後問人命。敢

有扛幫挾制者與犯人同罪。○按人命擡屍。若責之地方實無名。法物責之被告。人命若假亦無名。今後凡人命曾相毆者。法物及擡屍出自被告。若未真則原告擡屍。地方鄰佑借備法物。審明斷還。全虛者出自原告。

相屍宜早

一人命全在初簡。然辨血屍傷痕易辨。枯骨傷痕難辨。腐爛傷痕尤難。蓋透骨之傷。必須棍棒鐵石手足之傷。止及皮肉。其入骨者必淺。惟初死皮肉上。

血暈朗然至腐爛時傷處不傷處俱是一片青黑。即細辨亦未必真。今後人命若初打時未及告明。驗過則告狀時須一面遞狀一面即扛屍至城外。相驗若早不扛屍待皮肉臭爛不便相驗者先責屍親若干。

圖賴

一人命自盡。即在平民止問威逼。况尊長之於卑幼。家長之於家人。又有體統乎。刁民徃徃以此挾騙官司。亦不察而過計之。是道之刁誘之死也。今後

凡媳婦因公姑打罵。使女家人因家長打罵。遂致自盡者。先報知鄰佑。後告明本縣。無他重情。押出即便深埋。如有刁民。欲圖挾騙。或捏別故。審出各責若干。

禁牽告

一刁民告人命。多牽告婦人。或作因姦。或作見證。大意欲敗人閨門。又以有力之家。難於婦人一出。便與買和。今後人命狀內。不許牽告婦人。即果與婦人相關。有體面之家。初問亦不必出。如有原告差

人因而挾騙者責若干。直待審後果是相干。然後
出理。

治誣告硬證

人命多係棍徒起滅硬證。人命若假。止罪原告。若
輩亦何所敵。今後凡告人命不實者。原告反坐中。
證。以起滅詞。訟論枷號若干月。

人命湏知十款

一陋規地方。縣官簡屍。輒派紅圓領等物。固屬不可。
亦有纔告人命。即派種種什物。動輒以二三十兩。

計者窮民幾何。當此科派哉。新官如遇簡驗。只照常令地方搭廠。餘可省者省之。兇手不論真偽。湏要着人圍護。或鎖在轎前。恐防屍家打死。既難結局。亦不雅觀。至於打法兇慘。用錐用簪。有不忍聞見者。彼即應償。自有三尺。何得兇悖至是。切湏嚴禁。

一簡驗人命。生死所關。若縱之。則死者含冤。若誣之。則生者含冤。非細故也。故初簡者。湏是不避臭穢。先驗有傷無傷。無傷者不必簡。有傷者註定處數。

然後付之件作。如件作蒸過後，從新報有別痕者，亦註定處數，待件作報完，則問官塞鼻焚香，親至屍所細看。若復簡枯骨，氣息盡，辨在依稀，尤當親看。蓋件作視財貨為輕重，錢多者雖真，亦假；錢少者雖假，亦真。又件作頭一次報傷訖，則其家必藏底稿某處，紫紅某處微紅某處血蔭，萬一後次再使伊簡，則暗地藏在手心，照稿供報。如官府覺察，則暗伏心腹之人持稿在衆人場裡，暗打口號。其件作照號供報，雖至千簡萬簡，如出一手不差。

如二次三次。別使人簡。則新來件作。至前件作。處
買稿。又或招書討錢。私通後來件作。抄屍格賣稿。
就令官府精明。將新作作鎖在轎前。而後來件作。
必有同來之人。蚤向兩家講價。原告行賄。假者供
報多傷。被告行賄。真者供報傷淺。以致假反成真。
真反成假。此無他只問官不細心親驗之故也。今
後毋論初簡覆簡。只一親看。如十分不能看。將其
中喫緊幾處。一看真偽。自明錯報者。重責件作。問
罪。奸弊自絕矣。

一北地人命真者固多。假亦不少。蓋北方種菜多用砒信殺蟲。匹夫匹婦與人打罵。氣不可忍。輒服信以死。初時唇吻多黑。口出黃水。遍身或發泡。初簡手足指骨節俱紅。久則俱黑。遍身色俱慘黯。骨節亦有黑者。初仕不知。作作知者亦少。即知之。不得錢又不報。故一緊抵償。一或簡出服毒。上司又批駁云。倉卒之際。毒自何來。先某官簡無毒。今簡稱有毒。何也。一駁再駁。冤者甚衆。可為痛心。然作作為兇手買囑者多。每將砒信置死者口鼻中。或置

洗屍水內。骨色亦多黑。又不可不防。

老幼人命不真。係圖賴者。老之傷多在頭腦。則撞磕之故也。幼之傷多在一邊。則拋擲之故也。有踩死者。傷在腹背。其傷必闊大散漫。老幼在衆中。被人推跌踐踏死者。其傷亦然。

一貧民相毆。或激於一時之忿。打死婦人。義女。義男。其常也。然亦有圖賴者。若兩富相持。貧與富鬪。或貧民為富家所逼。其中婦人。義男。義女死者。多是圖賴。其傷多在頭腦。且極慘毒。若橫身一傷。至無

完膚。皆圖賴者也。蓋毆人者原無殺人之心。其傷必不重。若重必非毆死之傷也。斷此事者非再三詳審未必得其真。詳審之法問之原打地方人得之矣。

人命有毆殺有故殺有謀殺。毆者無心故者有心。謀者衆人共謀之也。毆殺謀殺者殺易辨。故殺者稍難辨。若謂其有心誰能誅其意。若謂其商之人則謀殺矣。然殺人賴人者皆謂之故。則有心之說是也。但要憑據如平時原有深恨因忿打死及刀

鎗殺人故殺也。蓋刀鎗非嘗試之物。以此行兇。便有殺人之心矣。然事無的據。不如以毆殺論更便。群毆人命。莫辨輕重。若父兄子弟在。重主使者。若係平人。則重首禍者。斟酌平人。

一凡民行兇打人。見人傷重。兇手懼而自盡。每每有被打人不死。而兇手死者。兇手之家。反來脅告。立案勿問。俟被打者既愈。酌審。若兇手因相打者身死。又因屍親威逼。不論真偽。懼而自盡。若被打身死者。有傷。准抵以兇手有應抵之罪也。若無傷。仍

治屍親威逼之罪。

一自盡人命。若有重傷。又曾毆鬪者。俱有律例在。若未鬪毆。一旦殺妻子。或自殺以賴人。此騙局也。死不足惜。然人誰不愛其身及妻子哉。其情亦可憐已。且愚人不知律法。哀死之心。與圖利之心。交戰胸中。求之未免太過。即其人可恨。其事可惡。不治被告者之罪足矣。

一人命行財。即實固也。然亦不可執。一。小人無知。見彼家人死。便倉卒不知所出。而棍徒搬弄。彼小心。

淺見者希圖了事。誰知告者執此為左券乎。故人
命但求真傷。行財非所論也。○按刁黠之民。遇官
府好察。多有原告之家。扮作被告之人。行賄使官
府之潛聞者。官府不肖。則原告扮作被告。欲賄之
狀。又竟不賄。以激怒官府者。在廉官。只不聽之。惟
細審真偽可耳。

人命出入

一人命真確。若係富家。又不為公論所容。斷不可聽
其和息。除抵償外。仍於兇手家量追棺木安家。若

係貧民偶以小忿毆死或苦主父母老子女幼不願抵償求得埋葬自給者此法所不聽情有可原寧可聽其講和若已經上司招內亦不必說出講和止將屍傷致命處改輕苦主既不執上司自允彼此皆得不死若拘執一定恐老幼奔馳衣食不給死者之冤未必雪兩家反有拖累之憂此不可不知也然湏斟酌不可一槩如此

狐疑人命

一人命狐疑或黑夜殺死無據與其殺不辜寧失不

經苟以意見羅織成獄。恐後有不勝悔者。京師一家被盜殺其全家止。婢子荷花獲免。法司以荷花同姦夫殺之也。坐凌遲處決。後盜出。問官皆得罪。夫一身榮辱不足計。但死者抱冤受慘惜哉。○按疑難人命。切不可信中證一面之詞。蓋中證多係買求。又有親識死黨。一聽其言。生死俱冤。又不必差人採訪。致起奸弊。但忽至原日相毆地方。鄰佑老弱皆目擊者。細審數人。真偽自見。

定罪詳慎

一人命論傷然傷有死者自撞自打有父兄子弟等打死賴人者此二事皆我輩居鄉所目擊若拘泥重傷則真偽不復辨矣。湏是審之中證某與某何事爭是何物打打傷某處或重或輕再三詳審然後可以定人之罪也。

定主使

一人命定主使必其人果與某爭果喝令子弟家人毆打至死方可謂之主使。邇來家人毆死人則訟者舍少賤而告尊長其實家長父兄一面未見大

都皆騙局也。若家長父子不在家人子弟。自以私忿爭打。便可當時開釋。即所爭者為家長父兄之事。家長父兄果在彼時。實未主使。此亦可當時開釋也。若未主使。但袖手旁觀。此不能無罪。然擬之不應足矣。切勿為奸人谿壑。

虛心曲辨

一問埋人命。切不可避嫌受囑。及執定成案。如富家人命。其事若假。不妨開豁。若從重擬。雖遠。瓜李萬一其人斃獄。亦何詞以謝之。我無暮夜之事。人自

不以此相疑。若聽人之囑。輒入人死。天理人心。必有報應。囑不止。鄉官問官。亦是至原問。擬死上司。已允我。若實見得非。慎母曰。恐傷上司。同寮之心。但曰。姑待來者。使來者亦云。此囚終無生理矣。但須委曲。不重傷原問者之心。乃有濟也。

斷人命三法

毆人至死及殺人者。抵償此重律也。雖經相毆。所以他故自盡死。不係真正打死者。擬威逼此輕律也。然勢豪凶悍。魚肉平民。聽其威逼而止。擬杖可乎。

故例中雖係自盡而有重傷者必擬軍此不重亦
不輕之例也。○按人命曾相毆及相罵者即是病
死不妨均擬威逼不必用強及自盡也。觀例有威
逼祖父母之文可知。若必用強子孫豈能威行祖
父母乎。

勿深求

一人命若真自然抵償但初問時不必求之太深發
之太暴恐苦主棍徒因而挾騙如兇手自盡便可
抵不必又深求一步近日多有捏作某人制死又

擬制死者之罪。從此多事矣。

平心

一問官太不重人命。則勢豪以人命為兒戲。太重人命。則刁民又以人命為奇貨。只須平心問理。真者償。偽者出。全虛者反坐。乃不滋弊。

敏速勿遲

一人命不論真偽。俱要作速完繳。人齊即問。屍到即簡。簡驗一真。即取定口詞。立地成招。三日後即解合于上司。若假。即令埋葬。不必申。但立案以杜後。

詞蓋人命事大。觀望者衆。若未經問明。即將兇手
重責送監。優游不斷。請託打點。此不必言。或愚民
以不肖之心。窺我衙門。人又因而誑騙。官聲且從
此敗戒之。

投河自縊之辨

已死人方投之河。則腦髓中不藏沙泥。為其氣不
足以呼吸故也。若活人投河。則呼吸泥沙。皆宿於
腦。用微水洗淨腦外。將清水一大盆。細細盪之。泥
沙自出。且奔命之時。兩手指扒泥扒石。其指縫必

有血蔭死人入河則不然。此按河之辨也。人死後用索絞之。其跡白而不紫紅。活人自縊者。其痕紅。紫易認。至於用索絞死人。則腦後八字痕不交了。俱在頸上。周圍如一圈。然自縊者。腦後分了。而不周圍。此自縊之辨也。洗冤錄宜詳看。○按上二說辨之明矣。若不係謀殺。而又以自縊之法令之死。則難辨矣。此須細問而察其情。思其故。未可草草。

治譜卷之七

中丞健吾先生余自強著

後學李長德仲延彙

蔡懋德公虞訂

李模子木閱

范志完叔愷叅

陳龍正幾亭評

胡璇政初較

賊盜門

訪盜

凡捕盜者覺察欲蚤撲捉欲速苟待失盜而後求盜事已晚矣然捕盜有法須知本源所在蓋小民為

飢寒所迫。雖有為盜之心。非得慣盜。當先終是疑。畏不敢。必是平時多盜之地。為盜之家。及慣窩之戶。誘之。到任後。即令刑房查歷年強盜卷案。以二十年為率。不論已獲未獲。已決未決。俱簡明摘要。開作一冊。冊造訖。隨喚捕役。後堂出其不意。各授一紙。令密寫真盜。及其住止。蓋凡為盜者。捕人皆知之。但事發得錢。則明知而不報。千人百眾。又欲言而怕報。惟先事令其密寫。所謂疾雷不及掩耳也。喚時仍吩咐錯報漏報者責若干。又吩咐盜發

失事者將若輩取比若干審捕役又吩咐訖暇則
於士夫正人君子中或齊民有身家德行者細密
採訪凡某某為盜皆載冊而熟記之待其事犯即
無真賊悉寘之法各處大盜既已得其姓名便密
令地方捕人伺察其動靜又再加以保甲善法未
有不聞風而遠遁者矣○附弭盜告示式某縣為
弭盜事照得為盜之家父子兄弟人等有同行而
脫網者或未曾上盜亦慣識四方之人熟知為盜
之事小民為盜合從引誘俱自此輩為之鄉保人

等細加體訪。此後果改行從善。即良民也。若有面生可疑之人。及常有牛馬等項在家。便是賊心。未改鄉保人等。即密報縣。以憑拿究。毋得畏徇容隱。亦不許妄指生事。違者治罪。

許告出首賞罰

凡一方盜久者。地方人俱知之。初盜者父兄知之。至二三次親戚知之。所以互相容隱。不即報官者。其在地方人等。多是懼禍。父兄則溺愛。此皆官司不嚴之過也。其鄉約首盜。亦有報復私仇。利其所有。

者切不可草草聽之。須出示云。照得強盜為害地方。人人切齒。父兄親戚地方人等。隱不報官。致盜賊公行。民不堪命。此後不拘新舊強盜。父兄人等有能出首者。照賞格給賞。違者照罰格治罪。敢有懷私報怨。累及無辜者。審出責若干。治罪。鄉約及父兄親戚人等。首出大盜一夥。賞若干。一名者。賞若干。拿獲大盜一夥者。賞若干。一名者。賞若干。報出窩戶一家者。賞若干。跟獲者。賞若干。以上俱照格給賞。外仍將強盜名下無主賊及家財重賞。父

兄親戚容隱不首者事發重責若干枷號若干月
問罪仍量追家財給報盜拿盜者鄉約人等容隱
及盜發不救者責若干問罪若挾仇首盜不實者
責若干問罪○按賞罰須是分別輕重方可以鼓
舞人心首盜者地方鄉約以重賞不首者父兄親
戚以重罰又上盜一二次者止罪父兄三四次者
罪及親戚一二月以上者罪及地方○按鄰人鄉
約首盜其實亦難蓋官司捕獲真盜或賊少或賊
有可疑即十數駁未已庶民之家出身首盜官司

能即置之死乎。勢必解之府道東奔西走。妨工費錢萬一不成。獄不惟有虛枉之罪。且群盜報復身命俱不可知。以難事責之小民。似非情矣。故須着實舉行。無以一時之姑息。釀地方之隱禍。久之人始無怨。所謂愚民不可與慮始。而可與樂成也。

察盜三條

一。強盜形狀特易識耳。平時不安生理。出入無時。一也。往來多面生可疑之人。二也。常有牛馬銀錢。費用不經。三也。或行兇使酒。氣燄逼人。四也。或以妻

為娼。相聚嫖賭。五也。保甲等登記一冊。出鄉必告。保甲所往。或其人結黨而出。即密報官。如十數日後。遠近地方有被盜者。便多方伺察。如其家費用不經。或於飲食之類。盛於平時。必有故也。果有跡可據。即把連赴官審問。不必待其犯矣。

一強盜情狀不同。有極富之家。身自為盜者。或養盜分贓者。在別處為盜。至本地方輕財好施。為鄉里所推重者。又有別處大盜。挾重貲至此。假作客商者。情形自是不同。或往來之人。出入之迹。富貴之

態主僕之間終是令人可疑其無故而暴富者尤可疑也付托得人細心譏察則人無遁矣。

一娼家酒樓開場賭博之家是為盜淵藪菴觀寺院次之誠能信賞必罰令捕人不時譏察不但得本地之盜已也四方大盜亦無所逃然捕人多假此以脅騙各家在當事駕馭之也。

治盜四條

一少年不事家人生業恣意賭博又三五成群好爭使氣皆為盜之漸也禁戒賭博散少惡之黨嚴連

坐之法皆所以杜其漸也。

一父兄不教訓子弟，戶長不教訓族人，鄉約不教約衆人，皆州縣法令之未行也。誠舉行鄉約，彰明法令，使一一遵守，皆知盜不可爲，未必無益於民情風俗也。

一士夫子弟亦有爲盜者，或窺人子女，或殺人報仇，或嫖賭無賴，皆自士夫身後爲之。亦有當其身爲之者，且所劫者多親屬，其原皆自棍徒引誘。始蓋棍徒欲引之入夥，以自爲地，其始也多誘之以子

女癡兒無識偶一為之一入其術中便為其所脅矣此須辨之於早當賭博時即先治其棍黨若必待其犯縱之非法殺之可憐然或知而未行又所犯者止親屬亦可情恕也

一鄉里豪傑黨與衆多不復為三尺所束縛若置之不問養成大亂是縱之使為盜也若求之太急觸彼禍机是激之使為亂也然此輩羽翼已成養之亦亂激之亦亂但不疾不徐觀變而動乃萬全也

平時禁約

一強盜劫人多。是出其不意。欺其無備。又恐業已進門。主人為盜所執。則家人不敢噉叫。鄰里不敢動手。如人家牆垣稍謹。或盜至門首。有一人上屋。或一人堵門。盜必不得入。賊之入門。必先投進火把。若有入即滅之。盜亦不敢遽入。然則盜之伎倆。亦可知也。誠平時有禁。令各家修理牆垣籬塹。又於二十三四至初六七夜。躬率男女紡織。稍有響動。即令人上屋。屋上多辨瓦石。又地方人等。互相救護。則盜自有畏而不敢近也。此語近迂。然每試每

驗○按楚諺云二十七八九家家打鋪守直待初
十後看家交與狗蓋盜賊動手多在無月光之日
與一更以後睡靜之時至鷄鳴則止矣自二十以
至于廿八九或二更無月可虞或一夜無月可虞
故云惟初十日以後月光四鼓方沒故稍可緩也
截殺法

一救護之法須辨之於早編立保甲時每村中即擇
子弟之年少有力者教之武藝不拘棍拳刀鎗等
項各熟一藝即於十家牌上註某鎗某刀某棍其

餘照前一一註定。不善武藝。但氣力可用。亦各執一器。或一家被盜。守更者以連放三銃為號。各家齊起。吶喊。勢可向前。即向前撲殺。如不可向前。止於要路上截殺。本村收護人多。不用別村。如本村人少。別村同救。亦以一二里為率。其餘聽見銃響。俱在各要路上等候。古人弭盜。有教民家家藏鼓。者一處盜發。處處鼓響。不頃刻而一二十里皆鼓聲。盜無得走者。此最妙法。但要行之力耳。至截殺之法。多用弓弩銃砲。又二更以後。禁人行。恐截盜。

者誤殺之也

防大盜四條

一白日強盜必劇盜也多在人烟稀少地方雖常殺人以嚇人其實有武藝勇力者不過數人昔年曾有數十人劫一家懸主人之首被地方人殺盡固亦不足畏也惟一二人出其不意脅主人而劫之金既去而地方人不之知也則救護極難然使法令素行到處有巡邏嚴察之人盜亦不敢入境也

一北方多響馬賊巡路必不可少然數百里之內責

之數人安能保其無事在。北地溝塹。墩夫欄木之。
類。一一俱有。但事久廢弛耳。誠一申明約束力行。
修緝。空閑處不便築牆。亦間掘大溝。以木為橋。令
其馬不能馳。間有響馬。切人一處放銃。各墩俱放
銃。先下欄木。地方引鄉兵各守道傍。待其至而接
之。須知響馬中亦如尋常賊盜。有武藝善射者亦
少。合衆人之力以攻之。易易也。然墩夫多偷安。須
時加謹戒。巡路快手又多向墩夫索錢。不可不知。
一北方響馬。操兵居半。南方水賊。哨船居半。知其為

盜盜可得矣。

一水賊有二種。黑夜抽幫者。伺人睡熟打劫。本地方
之人居多。有白晝殺人於江湖上者。多係遠方亡
命。出沒無常。江洋中有水程龜鑑一書。其言甚為
怕人。蓋大夥賊盜。往往裝作客船。其中有機阱。有
麻藥。一入船中。揚帆江心。即便動手。故客商有一
出無歸信者。蒙此禍也。此等盜賊。最難覺。亦最難
防。有一撫院。盡令江洋船隻。粉書籍貫姓名於風
棚上。亦好。但恐盜賊亦可偽寫。且各省客船。不能

一一取齊。不若着落各處船行查其歸日。申飭各處。拿捕探其行藏為妙。然治法難拘。存乎其人。

盜後立案

失主被盜後。有不首賊者。有不告失狀者。一恐負累日久。一恐強盜報復。失主不告官司。不知盜賊肆行無忌矣。須出示云。凡一村之內。有一家被盜。保正人等。星夜報官。失主即補失狀。保正補呈。或失主係寡婦孤兒。被盜殺傷。不能出告。戶長人等代呈。將入門出門形狀。劫去賊物。一一開寫明白。

金銀首飾。須開式樣。衣服器皿。須開顏色新舊。務要的確。以便日後對賊。銀子或大小錠。或碎塊。分兩俱要的開。不許以少開多。如預捏多數。希圖扳騙。雖係失主。亦不寬假。○按強盜多有以竊盜自脫。失主多有以竊作強者。須辨之於早。凡告失狀。後或親行。或委捕官到被盜地方。先審地方鄰佑。或明火執杖。四鄰通知。或暗進明出。四鄰有無知覺。或止竊盜。一一審問明白立案。又將賊數用印印過。待賊犯之日。一審自見。

告盜不足信

一失狀有不足憑信者。曾有一家因鬪毆殺人。遂以車載屍。告作陣上殺死。強盜無賴棍徒。或因婚姻田土小忿。打網害人。多有以盜情引狀者。故被盜後。即令地方報官。親自踏勘。不惟可以識盜情。亦可以杜謊狀也。尤可恨者。窮棍刁徒。本未失盜。而故扮失主。串通捕役。平白指良為盜。如劉勿所審出吳江事。此等罪大惡極。不可不重處。

申詳立限

一告狀後一面申詳合于上司一面查審保正人等有無救護照例賞罰一面懸重賞令強盜自首親戚鄉約人等出首一面責捕官捕人刻期拿盜○妙○法○即在以前各地方人家緝訪如真盜不獲嚴比捕人仍同捕官解上司責比

見形察影

一強盜打劫必有吊線之人或本家人或親戚其打劫之前一二日其人必以他事往來探其動定言語面目多是可疑即平日相認者來往頻數瞻視

不常亦是打聽消息。細審失主果有前項踪跡。即令捕人物色之盜可得矣。

窩家

一盜有遠近。窩家近多。不出五里外。遠至十五里。二
十里極矣。蓋強盜行劫。勢不能遠涉。一恐腹饑力
盡。二恐天明事露。凡盜發後。鄉約人等密訪附近
地方。往時豪傑形迹可疑者。亦可得其十之七八。

機密嚴諭

一地方報盜捕盜。須是鬼神不知。風雷迅速。方可捕。

得真盜。搜得真贓。一毫漏泄。遲回。則盜與贓俱不可得。即能得盜。亦未必得真贓也。捕得真盜。考贓之法。雖不可聽之。捕人若待到官。審贓無及矣。亦聽其順便起贓。但不許逼令妄攀。並尅落抵換。○按近日審盜。楚中最難。如在本處打劫。同夥有河南人。則打劫之夕。贓物即送之河南。打劫別地。亦然。拏獲真盜。即明認贓物所在。亦不可得。須嚴令捕人保正。賞罰並行。先事譏察。要諸道路。而撲捉之真贓。或可得也。再照捕人之慘。甚於強盜。臨事

時須再三戒諭。毋令賣盜。裁賊。逐家。嚇盜。違者。重處。庶可革積弊於萬一。

盜在別處

一拏獲大盜。或在別州縣地方。常有被處捕人。奪去爭功者。正官亦自以為功。執畱不放。使我輩處之。稍有形迹。即不妙。但申詳云。大盜某已在某處。拏獲。即可杜前卷矣。○按強盜在別州縣地方。必待行關。則機洩。徑自撲捉。或至拒捕。且恐彼處當事護短。反致多事。不如一面行關。一面撲捉。關上即

云若待貴縣差人恐漏洩不便除已差人緝捕外煩為添差協拏此兩便也。

保結

一強盜攀人有捕人主使者有為利者滿其欲即止。有報怨者若係睚眦之忿得利亦止。若深仇大怨則以死爭如祥刑錄中所載少年自誣以誣人之事可知已。近時強盜攀人必待招首改口然後釋放此大謬也。招首亦何厭之有。但戶長鄉約保結平素便當釋放何必假口於招首哉。然亦恐真盜

借親戚以為地方鄉約則保結亦不可不察。

緩訊

一強盜賊證未明且勿妄加箠楚牢固監候再加察訪果係真盜箠楚何難若係平民殺之可憐邇來州縣審盜多有情罪未明考訊已極迨審係無辜而死者已過半矣豈惟上官見之不雅此心恚亦不安。

慎入

一捕人畏比多以竊盜及平時不安生理者非刑逼

打令其招盜認賊數十人如出一口。因取破衣等件指作真賊。及見官俱俛首無說。使當官不察。則冤者衆矣。夫捕人求免刑罰。故不暇恤人之死。乃被執者亦自誣盜。果可易審乎。識者量之。

認盜真偽

失主有火下識認強盜者。然強盜劫人多。墨其面。又令主人不得仰視。且各為南北之音。主人即識其人。多不過二三人止矣。近日有告及三四十人者。人人以賄脫。不則執之。當事者亦任其肆行無

忌何也。

仇扳

一強盜多扳娼家。一則常往來其家。或使過大錢。或有贓物。一則報仇索錢。一則捕人使之也。一經行提事。白而家已敗矣。亦不可不加之意也。惟知情客留在家行劫分贓。則窩戶也。不可以其娼婦而釋之。

宦家失盜

一士夫之家告失狀。果贓明賊現。盡法行之可也。若

賊證一無可據。切不可追風捕影。波及無辜。往時某州有一士夫被盜。鄉隣被繫者數十人。久之知其為次子竊出也。無辜者乃得釋。遶門辱罵。有司亦不能制矣。

真賊

一強盜打劫情實。若有寸絲。即真賊也。若必得多賊。定罪則大盜不死。蓋求賊之意。只借以證其盜之真耳。非為其多賊而罪之也。

赦癡愚

一強盜家人或癡幼無知聽家長主使實未得財或未上盜衆人憐其答應勞苦與之敝衣惡裳亦未可作得財論蓋律重主使五刑赦癡愚也又茶坊酒肆強盜或食宿其家即所得酒食錢係盜賊亦不得因而擬罪若知其為盜則不能無罪也

盜賊要細審

一盜賊衣服牛馬金銀首飾器皿易辨然亦有假惟金銀極難辨今之治盜者欲入人罪往往以本人家原有衣服等物指作盜賊又有捕人將別人贓

物安作本人者。又有良民逼拷。不過將家私賣銀。完贓者。以此擬死死。皆冤民。而強盜反以無贓得脫。故審盜者。一毫不細心。則千里矣。

盜賊搶奪之辨

一律有白晝搶奪。無黑夜搶奪之文。豈不以黑夜者。即盜耶。然亦不可執一。聚人劫財。白晝亦盜。若鄉里愚民。原不為財。或爭牛馬。男女等項。不得用強奪去。或為人窘辱。相打報仇。即是黑夜順搶家財。終不謂之盜。但可引例。州縣治是獄。須先拘四鄰。

不則親至其地細審。若無故而發此難盜也。或出入主人之門。隣佑俱不知為何如人盜也。若原有爭鬪。彼此嚷鬧。即非盜矣。毫釐之際。識者辨之。

關取縣民

一別州縣來關本處小民。指稱為盜。須先拘鄰佑細審。如素不守分。方可發去。若係平民。鄰佑俱為之稱冤。若輕易發去。使彼處正官果賢。所費亦不少。如未必賢。則平民因此斃於囹圄。未可知也。

委官流毒

一盜發但令捕官撲捉捉獲即解堂細審若付之捕官具由其害不可勝言有一典史頗慧凡遇盜大堂悉發審理每問不復追賊定罪但責之攀人不攀人者備極考訊盜解其意無一不攀多人者得錢即放放後復攀納賄者真盜俱脫不能買命者雖招首已放尚在獄中後遇牢瘟每日出死人無數而正堂不知也冤哉痛哉然近日則習以為常矣人命至重願當事者留意焉

殺盜安民塞源拔本

一強盜有不係饑寒所迫者，非獨習俗所移，大都以賊證不明，官司無所治罪。又上司寬縱，可以幸其不死。此強盜之所以日甚也。若官司預知某家為盜，某家窩盜，使鄉約捕人，覘其虛實，先發制人，則得賊自不難。審實殺無赦，使人知為盜之必死，則為盜者必少矣。○按愛民莫如嚴，害民莫如姑息。如強盜一事，法令不嚴，使人玩愒待其已甚而誅之，則殺人必多。若法令一嚴，自不敢為盜，全活者甚衆。此寬嚴之明驗也。○再照強盜同居父子兄

弟不可輕縱，亦有同行夥盜不攀者，但搜出一賊，即未同行，亦當計賊論罪，即不同行不分賊，但知情，亦倍加責治。枷號數月，以儆來者。又強盜刦財，其妻子既享為盜之利，則當受為盜之害。事發必重責枷號，以為婦人不諫其夫之戒。又親戚朋友，雖未分賊，平時往來酒食之樂，亦盜賊也。事犯分別治之。若以借貸為名，此是得賊而避其名也。須按法重處。以孤賊盜之黨。然強盜父兄親戚中，亦有良善者，父不慈，子不孝，不相及也。然不首之罪。

人不可免。至若家人為盜，主人不知，則治其疎略之罪。知而不首，雖未分贓，亦治其縱容之罪。但得贓，即以養盜分贓論，不必論多寡也。又若強盜事犯，投止人家，不即報官，敢於藏匿，待捕人搜出，不知者不坐。若係舊識，雖未得錢，亦盡法治之。親戚又加常人一等，但得寸絲，即是盜贓也。又拏獲真盜，有截搶者，此夥盜也，須盡法治之。即其中有未上盜者，亦非良民，斷不可姑息。若使之得志，便習以成風矣。大都州縣在法令素行，每見數處事無

大小刁民拒捕動則差官此可發一大笑也他如數世為盜之家積習已久黨與衆多其中良善者必少間有一二未上盜者亦坐享為盜之利事犯須拔草除根同盜者悉置之法餘俱投之四裔籍沒其家平日交游親戚一一重治之此之謂拔本塞源也。

讞盜出入宜慎

一審盜須平心就事論事切不可矯枉太過有一令但審盜即斃之杖下問其故則其家曾為盜所劫

也。又有一士夫，凡遇強盜，不論真偽，悉縱之，問其故，則其父兄曾為盜所攀也。此之謂見刑廢履，胥失之矣。○按大盜有往時未犯，或以竊盜事犯，此審就在竊盜上論，但以往時打劫擬死可也。若賊仗夥盜失主，對證不明，寧可從輕，儻以平時可恨，必欲置之於法，或以竊作強，或栽以不相干贓物，彼反得以假口萬一上官廉得其實，反為若輩開辨竇也。鄉約人等反以此得罪官，且受不美之名。近日有司，每每恨上官縱盜，不知縱盜之禍，州縣

激成之也。○再照強盜雖無失主賊證若其人果
劇也亦未可輕縱如太湖劉如國等得而繫之獄
刑廳止問徒乃至哨聚山林動官兵而經奏請此
非養虎遺患哉又強盜無跡者官司未必能徑殺
之若果罪大惡極不為鄉里所容但令父兄戶首
以大義殺之尤便。○再照州縣有地方之責即上
司有意縱盜亦須着意緝捕○散其黨乃不為地
方患若忿懟上司遂任其橫行而徒諉罪於縱者
萬一釀成大禍誰之過歟。

失主告盜認賊不實

一失主或指名告強盜坐虛。或認賊不實。治之應得之罪。是矣。切不可過於朴責。恐閭巷聞之。以我輩為有心縱盜也。又愚夫愚婦。垂涎賊物。或官司以別人贓物試之。亦因而冒認。謂之小人貪利。則可。若執此以為強盜地。則不可也。

隄防護送

一獲盜。須晝夜隄防。作速招解。切不可因循釀禍。蓋強盜初獲。未必甘心就死。餘黨尚多。恐有反監越。

獄之事。如監利楊小洲直入獄中奪盜之事可鑒。至強盜解審。差人每每受餌。令其過家。或夥盜劫去。或用計脫逃。即不然而一方平民亦不勝其擾。竊盜亦然。蓋強盜竊盜。無論親戚仇家。俱畏其仇。攀防其暗害。無不極意奉承者。差人亦利此一行。故往往墮盜賊之術。非辨之於早。禁之極嚴。不足以革此弊也。

慎重機警

一尋常之盜。處之不難。若大盜盤據一方。全在慎重。

相機。或賊衆可馴。則以渤海故事行之。不則有朝歌故事。斟酌在人。然非粗浮者所能辨也。昔廣東有大盜。以海為家。隨潮出沒。凡新官至。必多方打點。且有為先容者。丘若泰出守潮州。知之。未到任。即令民快有勇者。艤船以待。果有十數人至。執而殺之。羣盜自散。大都每盜一夥。為首者不過數人。誅其首惡。其禍自熄。此一說也。如賊勢方盛。誅此數人不係有無反。以速禍。是在當事者察之。若倉卒機警。如吾銅張襄憲先生。計擒滑縣挾刃之盜。

又閩中一先達撫廣東銳意除盜誅殺頗多一日
出巡布於於多人伏道左公遙望之曰此盜也縛
之果然此智畧不可先傳也

狡盜

一地方有世盜有大盜有智盜此俱未可草草治也
而智盜尤難處如往時悍地盜家令其子弟分布
江防捕廳捕衙事未發而彼之布置已定矣此一
狡也又或有數省數州縣人合為一黨其賊即當
夜傳送不數日已在數百里外矣此又一狡也此

等盜非計定後行。如鷙鳥之無虛發不可。

礦鹽徒

一礦徒鹽徒聚衆拒捕與盜無異。其實不同。蓋此輩難抗法。未嘗害及地方。如力能制其死命。誅首惡以散其黨。不然且勿輕易。萬一不得志。所損不少。然捕人平時嘗與此輩交歡。一不如所欲。便多方以激上人之怒。識此情狀。自不妄行取困。

投鼠

一諸生中多有窩盜者。有司先在狐疑之間。不過計

也。追廉得其真，其人已不可復得矣。凡遇此等果
真，即通學有狐兔之悲，督學有鼠器之恨，無傷也。
然亦須委曲，先為學道地。又須明正其罪，少存體
面，方可以服諸生之心。

博訪決疑

一強盜入監。情實畢露，囚犯禁子悉知之。如其中有
可疑之人，細訪若輩了然矣。然可偶一為之耳。

招降携黨

一大夥強盜，牢不可破，須出示招安，令其改過。又須

離間使人人自疑。不久自散。又大出告示。凡地方
強盜。或願投戈。鄉里大盜。或願回心向善。不論多
寡。但肯自首。俱准自新。全活尤衆。嘗見前輩。於盜
賊出沒地方。或建衙門。或擇子弟之俊秀者。給之
衣巾。多方引進。使之漸漸降心。亦弭盜一事也。
戒嚴防衛

城市被盜。大不雅觀。庫藏則關係尤重。故當防之
於早。防之之法。凡州縣出入。須擇有武藝力氣者。
自衛。不然。非所以備緩急也。

隨時通變

一問盜不可執一。如平時禁盜。法不嚴則人不畏。故賊少必誅。如凶年饑歲。人皆為盜。一一以寸絲殺之。詎可勝誅。或人少或賊少。偶一從輕可矣。若黨與衆多。又不可一一縱之。變通在人。不容膠柱。

憐才緩死

一大盜果有絕人之技。可用之才。殺之可惜。若遽以戴淵之事行之。恐不可得。但以賊罪未明。請之合于上司。多方以緩其死。亦愛惜人才之一事也。然。

亦○令○其○曉○然○知○我○待○以○不○死○之○意○又○以○深○恩○固○結○
之○乃○可○得○其○死○力○也○此○與○獄○囚○示○恩○一○段○互○看○

記竊盜名之妙

一竊盜徒滿歸家便畧無畏忌偷盜恃強鄉里視之
如毒不制之為害不小須立一簿凡曾經竊盜問
徒人犯俱填註簿上俱照里分次序一一開註明
白無事則時譏察之拏盜即責彼同緝捕之亦妙
物色盜黨

一不論強盜竊盜一經事犯餘黨便在外大肆剽掠

極力救援。或打點。或請托。故盜賊事犯後。必索求。餘黨。不惟除兇人之羽翼。亦杜閭閻蔓患也。捕黨之法。密令禁子物色之足矣。或外面盜發出其不意。索之獄中。多有得真賊者。黃州曾有此事。

審辨真偽宜耐煩

一切事雖極重大。皆易訊審。惟事關強盜。得情最難。蓋強盜鐵口。非用刑不吐。而一味用刑。箠楚之下。何求不得。強盜未必輸情。仇扳之民。徃徃怕刑。屈認。覆盆黑天者。有之矣。問官於此。切戒性氣。或雖

非粗心浮氣而心事纏胸苦不耐煩切勿遽審蓋
審者詳審之謂古人名此良有深意也若非細心
耐煩輒便嚴刑嚴刑所供必多自罔問官又不知
落筆附案之害據彼信口一篇我即信手胡寫一
單招房利於害人輒粘連附卷用印鈐合以圖勾
攝取錢之利官府忠厚如欲帶進衙內則詐稟此
係當堂口詞不便更改以至問官嫌疑只得照單
寫票賄差虎捕此票一到鄉下口稱拏盜誰家不
害誰敢向邇此單一印粘卷有姓名人便謂之卷

盜就令他日辨出身家妻子必不保矣故凡審盜之日先在衙中一一彙輯各犯節畧擇其情較真而狀較惡者隔別衆犯先拷之拷之之法既不可不用夾又不可狠用夾如彼不認及認而不像務要時緊時鬆緊之以迫其吐鬆之以誘其言反覆折問如有隙可入有端可猜及有情節可據便須耐煩着意加工細拷得此一人的是真盜然後再拷夥黨一總共幾多人夥黨姓名既得然後逐名拷其年紀拷其狀貌拷其住址拷其何人主謀何

人為首。何人在外把風。何人入門明火。及劫財傷人等項。供寫畢。又從中抽問。或從後倒問。翻來覆去。如其一毫不差。此是真正情節無疑矣。再吊諸犯對審果的。此等單方可同審語印過附卷。若是覆咨差謬。此中必有仇扳之人。或有真夥未出情節未真者。或再拷此盜。或別拷供真之盜。俟的而後存之。切不可遽以參差供單胡亂附卷也。如此訊盜。真盜出則假盜者盡可釋放。除惡安民一舉而兩得之矣。

拏盜法

一有人賊一時俱獲者幸也。不然有跡可疑。可以因緣根究。亦幸也。若失盜之後。全無影響。從何處下手乎。曰。捕役盜之窟穴也。每一積年捕役。諸盜必有月錢。凡屬真正慣盜。此輩豈惟不拏。且從而庇護之。養為賺錢之資。甚至有洩機干彼而使遠逃。潛踪于城而落捕家者。地方大盜生發。失財果多。待失主逃失狀後。有司宜差着實人。乘夜呼喚。積年老捕。老捕家如有踪跡可疑之人。一便擒來審。

問天網奇幸。甚至有隨身之賊。一時並獲者。若忍
所差之人。賣放。仍再添人踪跡之。不可延遲。立等
回話。如捕役之家。果無別人。即乘夜曉。譬捕役每
三日。不獲真盜。每三日一比。如拏獲真盜。起獲真
賊。即將失主獲賊。分半給賞。吩咐諄切。着實力行。
至二三比後。真盜未有不。出者。然拏真盜。又須以
人賊俱獲為主。賊獲多。賞亦與之俱多。賊獲真而
少。記下。談賞。俟多起。出日。多行給賞。若無賊及賊
可疑。雖獲人。猶責。若係仇拏。問明之後。加等重處。

一一吩咐要明且要一片至誠心勸懲鼓舞他真盜真賊必得。

拏盜票

一凡拏盜之票不可未得真盜混混差拏即已得真盜緝拏餘黨亦不可不寫名字住址年貌明白若糊塗混混拏家家可嚇索矣宜云為拏盜事照得某盜供某人同夥合行拏審真偽除本犯外不許差人妄至鄰家侵害詐嚇如違重究計開拏盜一名年幾十歲貌有鬚無鬚面白面黑住居某處賊若

干以下即殊標空字如此則殊人之弊少矣。

大盜招式

一招書最可惡者極不欲將真偽分別明白。綱紀赫
索之路而官府筆下不清。又有拖泥帶水之病。又
或審斷無術。涇渭不明。雖有欲釋求生之心。終無
執筆如刀之意。以是扳扯姓名。一入招冊。能出牢
籠者鮮矣。即勉強出脫。終有糊塗假放之根。或已
出而復拏。甯者有之矣。故大盜招情先叙過盜情。
虞又在後面叙云。比盜某又不合。因仇誣扳某人。

某人若干如係駁問之招則云盜某又不合誣扳
某人某人或因中證仇口或因本盜仇害以致某
衙門問擬如何至招後接審語處當云今蒙某縣
某官將一千人犯細審出某某真偽如何此下方
接勘得審語審語後又剔一句云為此除將無辜
某人審釋或候詳外今將真盜某某等取問罪犯
一照出之後開列審明釋放幾名某人某人俱明犯
某死罪盜犯幾名某人某人
一照提一名某人年幾十歲身長身短有髭無髭面

黑面白某縣某地方人。
一名某人年幾十歲身肥身瘦有鬚無鬚面黃面麻。
某州某地方人。

以上照提共計幾名如此則真偽了然盜無不
除民無不安而上司亦不駁即駁亦不過云事
關大獄不厭詳慎且照提某人等未經拏獲仰
某官星速再緝仍將招內人犯再一研審確報
繳亦不至有詢縱之語及縣官矣。